

弗違

採珠行

林兆珂

督院林富之孫
郡守莆田進士

先大夫少司馬公之制兩粵也疏罷採
珠視中官柄廉人至今尸祝之不佞來
守是邦故老時談採珠暨中官作威狀
輒頌先大夫德不置不佞懼承平日久
後之人或未悉是
狀也迺系以詞

水府鮫人室漢臯神女遊上燭玉繩於中夜下
弄日月於橫流或啣恩而灑淚或解佩而潛畱
七采胎璣產巨蚌河宗獻寶朝陽侯重淵深抱
驪龍睡赤水空驚象罔求赤水重淵何微茫投

珠抵璧自虞唐漢家神武威荒服豈以珍珠問
越裳武皇宵旰垂南顧節鉞之權寄貂璫太清
明月薄蟾蜍詔書南下大徵珠歲發金錢三百
萬渤海橫天尾舳艫倏忽狂飈吹浪起帆摧舵
折舟欲圯哀哀呼天天不聞十萬壯丁半生死
死者長葬魚腹間生者無語摧心肝羣驅爭赴
龍鼉窟那顧安流與急瀾蛟龍厲齒驕相向積
血化爲海水丹恨不遠從遼海戍縱往死地死
猶寬採得珠光似綺霞萬死一生報國家珮環

未動後宮色夜光已照邯鄲車千村萬落盡蒿
藜白日無光鬼夜啼豺狼路嗥燕巢木天吳海
若無安棲我祖力摧虎豹關九重天子動龍顏
詔下明光罷採貢豪奴竄首詣長安君不見伏
波橫海標銅柱風雲依舊蒼梧山太守孟嘗空
似我但問明珠還未還

贈李珪平海寇歌

明王翰教授

傘圓山下龍馬跡鐵船入海蒼虬立珥江江外
戰塵飛銅柱折摧土花碧蠻酋矯首抗王師天

風怒掃蚩尤旗富良一戰百萬破破船南走占
城棲聖朝服遠多恩澤降者授官擒者釋四方
玉馬貢神京萬里華彝歸禹蹟萬寧蛇豕何悵
悵鼎鑊之魚徒跳踉臙腫直擣白龍尾片颿不
許歸蠻鄉覃懷大師萬人傑談笑揮兵靜餘孽
斬馘克逆檣櫓空檻送俘囚獻金闕轉首金風
又報秋長空一碧機槍收鯨鯢深藏海波息好
掛長劒歸神州紫鳳啣書九天上下祖帳高張滿
原野安得吉甫頌清風便擬車攻繼周雅

邊鎮

張國經

鐵甲雄兵鎮遠陞紅牙黑臉矢如颼閉關不受
越裳獻抵壁何須象罔求煮海爲鹽烟萬竈雙
桅羣漿汴千舟本緣帝德彛邦靖却笑標銅故
自讐

卽事

梅雨三旬水浸埤蒼茫氣色起蛟螭王程盡說
天涯遠吏隱偏於海角宜多病所須爲調攝有
官何必問遷移狎憑親友漁樵話誰道投荒是

索居

倦遊

多熱沉檀誦少微
休衙日久坐衙稀
滌腸常飲廉江潔
觸眼猶嫌止水肥
一帶澄波消鱷浪
三洲砥柱隱漁磯
童頭豁齒成何事
猿鶴山中怨不歸

薏苡

宋蘇軾

伏波飯薏苡禦瘴傳神良
能除五豁毒不救讒言傷
讒言風雨過瘴癘久亦亡
兩俱不足治但

變草木長草木各有宜珍產駢南荒絳囊懸荔
雪粉剖枕櫛不謂蓬萊姿中有糧春爲
綠圓炊作菰米香子美拾橡栗黃精狂空腸
今吾獨何者玉粒照座光

廉州龍眼質味殊絕可敵荔枝
蘇軾

龍眼與荔枝異出同父祖端如柑與橘未易相
可否異哉西海濱琪樹羅元圃纍纍似桃李一
一流膏乳坐疑星隕空又恐珠還浦圖經未嘗
說玉食遠莫數獨有皺皮生弄色映瑯俎蠻荒

非汝辱幸免妃子汗

賦

還珠賦

令狐楚

唐中書侍郎

物之多兮珠爲珍通其貨而濟乎人纔披沙以
晶耀俄錯彩以璘玢避無厭之心去之他境歸
克儉之政還乎舊津由是觀德孰云無神相彼
南州昔無廉吏富其潤屋貪以敗類孤漢主析
圭之恩奪蒼梧易末之利濫源旣啟眞質斯闕
從于舊而不瑕諒天盼兮有自孟君來止惠政

潛施欲不欲之欲爲無爲之爲不召其珠珠無
脛而至不移其俗俗如影之隨爾其狀也掩星
彩迷瑤月燦燦離離與波逶迤乍入潭心時依
浦口驚泉客之初泣疑馮夷之始剖依於仁里
天亦何言富彼貪夫神之所否沙下兮泥間韜
光兮自閑映百華之皎皎雜魚目之鰥鰥豈比
黃帝之使象罔元珠乃得蘭生之詭秦主荆玉
斯還由是發潤洲蘋增輝崖草水容益媚澤氣
彌好川實效珍地寧愛寶隱見諒符乎龍躍虧

全非係乎蚌老豈惟彰太守之深仁所以表天子之至道觀夫采耀外炫英華內含飾君之履今豈不可照君之車今豈不堪猶未遭於采拾尚見滯于江潭雖舊史之錄與前賢之談終思入掬以騰價求得書紳而勵貪於惟明時不貴異物徒飾表者招累而握珍者難屈是珍也居下流而委棄歷終歲而堙鬱望高鑒兮暗投盡餘光之恍怫

颶風賦

宋蘇軾